

Dr. Anna Bayerova, je rođena 4. novembra 1853. u Vojtjehovu (danas dio grada Mšeno) kod Melnika, u današnjoj Češkoj.

Češka liječnica. Studirala je medicinu u Cirihu i Bernu, gdje je i diplomirala 1881. godine.

Dr. Bayerova je bila prva žena ljekar u Bosni, a rad je počela u Tuzli 8. januara 1892. godine. Zbog zdravstvenog stanja zatražila je premještaj, te je po odobrenju rad nastavila u Sarajevu u augustu 1892. godine. Nažalost vrlo kratko se zadržala u Bosni, jer je početkom januara zbog ličnih obaveza tražila otpust iz službe i 30. januara 1893. godine vratila se u Češku.

Iako se u Bosni zadržala samo 13 mjeseci njena uloga je bila veoma važna, jer je uspostavila sistem rada, upoznala se sa zdravstvenim, ekonomskim i socijalnim stanjem, a svojim odgovornim radom uvjerila vlasti da je neophodno prisustvo žena ljekara u Bosni i Hercegovini i tako otvorila put drugim ženama ljekarima koje su došle poslije nje.


Veći dio svog radnog angažmana provela je u Švicarskoj. Pisala je novinske članke o medicini, higijeni i iskustvima u radu u Švicarskoj. Također se bavila i prevodenjem stručne literature. Borila se za ženska prava i aktivno bila uključena u kampanje protiv alkoholizma.

Dr. Anna Bayerova je umrla 24. januara 1924. godine u Pragu.



Dr. Anna Bayerova (autor portreta: Jan Vilímek)
(Izvor: Humoristické listy, Ročník 31/1889, číslo 23, strana 205.)


Ana Bayerova



Dopis Zemaljske vlade Bosne i Hercegovine, upućen Visokom ministarstvu u Beču. Zemaljska vlada izražava pozitivno mišljenje u vezi s odobravanjem isplate honorara za liječnicu dr. gđicu Annu Bayerovu, koja je aktivna u Tuzli. Predlaže se da se honorar isplati iz stavke 'troškovi distrikta' u budžetu za 1892. godinu. (ABH, ZMF)

„Vaša vijest da su sa mnom u Beču zadovoljni, zainteresovala me je – ne mogu da kažem obradovala – mene raduje zahvalan pogled mojih muslimanki i njihovo zadovoljstvo što sa njima postupam pošteno i iskreno, do te mjere, da me sve ostalo ne interesuje.“

Iz pisma Dr. Anne Bayerove.
(Navedeno prema: Ctibot Nečas, Delatnost službenih lekarki u Bosni i Hercegovini 1892-1918. Istorijski zbornik, Institut za istoriju Banja Luka, br. 9, Banja Luka 1988, str. 95)



Prva stranica dokumenta iz 1892. godine u kome se opisuje plan austrougarske administracije za uvođenje liječnica u Bosnu, prvenstveno radi pružanja zdravstvene zaštite muslimankama koje iz vjerskih razloga nisu posjećivale muške liječnike. Nakon početnog angažmana dr. Bayerove u Tuzli, dokument analizira nedostatak podataka o zdravlju, izazove u pronalaženju kvalificiranih liječnica i predlaže strategiju za njihovu regrutaciju i obrazovanje uz obavezan desetogodišnji rad u Bosni, sve u cilju poboljšanja zdravlja i ostvarivanja "civilizatorske misije" Monarhije. (ABH, ZMF)